

[Augsburg], 8. Januar 1579

An Theodor Zwinger

UB Basel, Fr. Gr. I 11, fol. 357r.  
Lit.: Husner S. 155 (mit Auszug).

S. Vtinam verò, Clariss[ime] vir, D[omine] et amice colende, non ad Hippocratem tantum, sed et ad alia plurima diuini ingenij tui monumenta perficienda, et vita et prosperrima valetudo tibi suppetat. Ego valeo γεροντικῶς, sic tamen (δόξα καὶ χάρις τῷ θεῷ) ut et munere meo fungar, et acerbis doloribus caream, et varia lectione atque scriptione me per ocium oblectem: quamuis me frustra scribere video, typographis tam nunc à meis scriptis abhorrentibus, quam illa eis non ita olim fuere περιμάχητα. Cano tamen mihi et Musis. Sed Hippocratem tuum, Episcopianum Lexicon, Pernaeum Plotinum, videre gestio. Henricum Stephanum cessare miror. Valde vereor, ne quid homini φιλοπονωτάτῳ acciderit aduersi: quod Deus auertat. Wirsungi rationibus unà mecum complures alij consultum volunt. Sed exaruit, propter regum perfidiam, Augustana liberalitas: opibus urbis ultra octo milliones, dum hic ego viuo, ut periti rerum talium perhibent, imminutis. Puto tamen eum breui laureolam à vobis petiturum: quae quantum in hac ciuitate illi profutura sit, euidem nescio. Nam plerique nouitij medici hic frigent, esurituri etiam, nisi aliunde haberent, unde viuerent. Itaque me Grammaticae meae indies minus ac minus paenitet. Quod verò tu me in amicorum tuorum numero (quae tua est humanitas) habere dignaris: id verò palmarium mihi esse duco: meamqüe erga te obseruantiam, quoad vixero, declarabo καδ' δύναμιν. Vale. 8. Ianuarij Anno 1579: quem tibi et onmibus bonis faustum et felicem esse volo.

Hieronymus  
Wolfius T[uus].

Requiritur à multis Suidas Latinus et Epictetus meus, nec in ullis bibliopolijs in nostra Suevia, Franconia et Bauaria prostant. Quare si qua exempla alicubi delitescunt, ea Francofurtum allata bene distractum iri auguror. Sin nulla supersunt: ego à Suida è Camerarij annotationibus locupletando, et ab Epicteto corrigendo et item augendo, non abhorreo: modò Gemusaeus recudere non grauetur. Sin is noluerit: ad Francofurtenses typographos, aut Henricum Stephanum labores mei deferentur: id quod Oporinus noster minimè passus fuisse. Mercedem aliam non postulo, nisi quinquagena exempla, quae patronis et amicis donem. Iterum vale.